



1A SESSIONE ORDINARIA PÈ U 2017

RIUNIONE DI I 27 È 28 D'APRILE

N° 2017/O1/025

QUISTIONE ORALE SPOSTA DA Mme Rosa PROSPERI

À nome di u gruppu « CORSICA LIBERA »

OGETTU: Sperimentazione in materia d'asestu fundiaru agricolu

Sgiò Presidente di l'ODARC,

Tutti sapemu chì a Corsica cunnosce una situazione di disordine ghjuridicu fundiaru particularmente caratterizzata da un'assenza di tituli di pruprietà.

Per memoria, arricurdemu ci semplicemente chì 34% di e parcelle cadastrate sò oghje in pusessu di persone fisiche nate nanzu à u 1910.

Stu disordine tocca di modu impurtente u spaziu fundiaru agricolu, custituisce un frenu à a messa in valore, è cuntribuisce à creà precarità, particularmente in ambiu rurale.

Di fatti, l'assenza di i tituli di pruprietà nantu à e parcelle agricole ùn permette a so mubilisazione in u quattru d'asesti cullettivi, chì sò spessu indispensabile pè da capu à l'oblighi liati à e pratiche, à a geugrafia è à l'ambiu naturale. U _Prefettu di Corsica Suprana l'hà d'altronde ramintata pocu fà.

Ùn si pò cuncepisce oghje ch'ella durghi torna assai st'insecurità ghjuridica.

Ci tocca dunque à splurà tutte e piste chì permetterianu di scioglie sta situazione, in adeguazione cun e dispusizione di a lege aduttata di dicembre 2016, à l'iniziativa di l'eletti è l'istituzione di a Corsica.

In issu spiritu, si puderia prevede di mette à u studiu una sperimentazione d'Assestu Fundiaru è di Fureste (AFAF), chì ghjè cum'è l'AFP, un modu d'assestu di u fundiaru agricolu, ma dinù un'operazione di rimembramentu chì vale titolatura permettendu l'iscrizione à u registru di l'iputeche ? Di più, sta prucedura permette u scambiu parcellariu è dunque a valurizzazione di e terre, senza diritti di mutazione. Sta prucedura seria di sicuru accumpagnata da i nutari di Corsica è da u GIRTEC.

Issa sperimentazione puderia fà si nantu à un situ pilotu sceltu da i servizii cumpetenti.

Vi ringraziu pè a vostra risposta.